

本朝分省人物考

人物考卷之三十七目錄

南直隸徽州府二

吳漳

程材

余密

鄭晃

程文

戴銑

唐澤

潘珍

唐濂

鄭佐

唐臯

汪玄錫

潘旦

潘鑑

張芝

曹深

程昌

葉天球

馮靖

胡宗憲

朱永寧

汪道昆

鮑道明

鮑象賢

潘潢

江珍

程嗣功

程旦

程廷策

程金

汪一中

許國

張一桂

程默

莊英

吳成器

江東之

吳應明

吳宗堯

潘士蓀

潘絲

程振

謝用

陳倫

補遺

唐仲實

康永韶

汪仲魯

唐子儀

汪敬

江浩

莊歛

汪尚寧

殷正茂

方良曙

程大賓

凌瑄

游應乾

胡宥

黃應坤

余懋學

曹樓

方揚

吳際可

楊武烈

吳中明

范涑

本朝京省人物考卷之三十七

南直隸徽州府二

吳漳

吳漳字清甫歙縣人弘治十二年進士由胙城知縣徵拜御史巡按北直貪墨歛迹京圻肅然陞山東副使會巨盜倡亂一時人心洶洶漳運籌設略不旬日而渠魁就縛餘黨就殲以擒賊功加陞僉都御史服俸卒

程材

程材字良用歙人弘治丙辰進士授汀州府推官治

獄多平反 召試御史疏劾尸祿大臣二人臺長戒
試御史無輕言事材曰試御史非言官耶 武宗卽
位疏陳 陛下登極之初宜疊發休祥而災異洊興
者良由闔尹馬永成谷大用劉瑾輩竊弄威柄所致
願反身脩德信用忠賢凡逸遊之具不正之人無益
之事可緩之征乞一切罷去疏入不報出按浙江盡
瘁卒于官材究心理學抱負甚偉未竟厥施沒三年
劉瑾追論往疏徙其家海南嘉靖初 詔還遣官諭
祭

余 瑩

余罄字宗器婺源人弘治甲子舉于鄉選江西建昌府廣昌縣知縣縣多盜又苦征歛人民流徙罄至裁濫供完城堞招流移請于上官力行惠民之政六事盜賊屏跡流民來歸戶口增三之一初正統間歛江浩令廣昌有善政至是民歌前江父後余母云宸濠變作都御史王守仁移檄討罪罄整旅從戰馘斬爲多會權倖攘功爵賞不行在廣昌凡七年中忌謝事歸民號泣追送持金爲贐不受歸隱山谷中足不至城府後守仁奉命征思田疏罄自隨罄已疾革矣廣昌祠之名宦

鄭晃

鄭晃祁門人登弘治甲子鄉薦任曹州學正常俸外諸餽送儀一槩遣謝流賊入寇督諸生偕知州分門守禦賊駭而去諸隣郡破者十九曹州獨賴以全事聞旌賚有加陞長沙通判郡糧百萬徵輸獨難晃至革秤頭火耗諸弊開心布誠逋負盡完陞馬湖府同知會芒官土官構叛捕勦不能得晃檄領土兵助官兵進討擒其渠魁餘黨悉降事平有綺金之賜方擬擢用一疾竟殂囊中曾無寸積所在官司賻助以歸

程文

程文婺源人弘治進士歷廣東兵備徭蠻嘯聚議兵征勦獨開誠曉諭徭感化休致居鄉有司罕見其面

戴 銑

戴銑婺源人弘治己未進士擢給事中正德初逆瑾擅權荼毒中外銑同六科極言中璫橫恣之害得旨廷杖落職竟卒

唐 澤

唐澤歙縣人登弘治壬戌進士任平鄉知縣築河堤八十里以息水患擢福建副使有勦賊功累官副都御史巡撫甘肅處吐密土魯番撫馭有方各得效順

以病乞歸卒于涼州

潘珍

潘珍字玉卿世居婺源之桃溪弘治壬戌登進士授
浙江紹興府諸暨縣知縣政務循良不事苛矯創建
預備倉更拓養濟院新孔子廟程力計工民不知勞
以治行徵拜大理寺左評事陞左寺副考滿廷尉西
臺政府咸以明敏允克署其實尋陞山東按察司僉
事時劇寇劉六等流劫東郡珍分巡東兗整棚民兵
護衛親藩賊猝至城下攻東門不得入乃去大掠曲
阜珍奏白徙縣築城而曲阜始寧明年更巡海右都

司某多內援怙勢侵削軍士怨苦珍廉訪獲狀按治
抵法一道肅然更巡東充再更遼東東寧陞本司副
使巡察海道時沿海衛倉官攢滿待勘吏緣爲奸查
駁至四五年典衣鬻子有隕身者爲立法不必再勘
死者厚恤之會丁父憂服闋起巡福建海道捕擒劇
寇三百餘有白金紵絲之賜括民間私造大船可浮
海者買給水寨禁弗得再造而奸源以塞陞山東按
察使珍凡三任山東施澤旣久人心信愛稱爲潘青
天云陞湖廣右布政使尋轉左時巨璫差修承天
皇陵供費甚侈乃量司帑所蓄旣汰其三之二復分

派隣省及取九江料銀協濟而湖民之困以舒湖賦
王祿爲重近富者多以賂脫顧派取遠貧之邑旣劑
量不平又多逋欠乃隨地所宜而賦之民皆稱便陞
右副都御史巡撫遼東贊理軍務築邊牆繕城堡濬
壕塹清屯田廣積蓄利器械內修大備明年丁母憂
服闋改南京右副都御史提督操江乃教造蜈蚣船
及八槳船皆迅速如飛追賊無弗及者擒斬番賊徐
勲等獲其番物輸之官尋陞南京兵部右侍郎召入
兵部改左適安南請討莫登庸廷議遣將提兵問罪
珍抗疏言北虜陸梁邊烽屢警宜備此虜以急不可

懷之強寇安南遠裔又本陳氏故土黎氏纂之今莫氏復纂之禍亂相仍夷方常事宜先遣使諭以禍福如其款服則順而撫之未可遽勒王師廷議以成命旣下不宜撓阻罷之閑住後師至南中一如其言而安南平於是南臺合章乞還珍官不報會遇恩詔獲致仕是後大臣撫按多薦起而已卒矣

唐 濂

唐濂字景之別號松坡歙縣人幼聰穎強記出語驚人入郡庠文譽大起登弘治丙辰進士授南京太常博士濂惟國家大事在茲稽肄惟謹簡庖役嚴壇禁

滌牲牢協贊諸郎臨之以分不少假貸京府臣弗躬
陵祀嚴檄之繼是無敢弗躬者南城太和二羅公繼
蒞太常皆謂能重其官三年考績試廣東道監察御
史巡視西城不縱不激惟法無勢有內侍家人馳馬
傷人執而法之內侍不敢怨臺幕挾權姦爲橫家人
馳馬與醉人爭道執送濂欲誣以刼馬濂笑曰醉人
耳杖而遣之濂以守令數易惠鮮及民而吏緣爲姦
憲臣行部下上交諂庶事日廢大傷治體上疏復久
任法尋差刷卷湖廣僅一月而宿蠹盡滌召還列羣
吏臧否狀請行黜陟又建白息民計歲備武靖邊等

數事詔議行之巡按江西時宸濠反機露矣道聞母病馳歸十日而母卒遂病毀旣而江西變起以郡當兵衝凡守禦之策力起贊畫焉事平後民兵太橫言於郡減之歸四月疾復作遂不起生平喜交游天下名士以名節相激昂在家進諸弟姪而課之業修先墓在藤源葛塘者復其堂若田爲石坊大書仲實對高廟語其上以彰殊遇又請諸郡梓梅臞以下三先生集其自著有松坡藁藏于家年三十六

鄭佐

鄭佐字時夫歛巖鎮人舉正德甲戌進士授南刑部

主事數讞決疑事庭中稱平改祠部奏立新安文公
後博士 世宗入繼大統抗疏議禮又極陳清寧宮
後殿災變之由出爲福建按察僉事副使尋備兵饒
州前後誅閩饒宿寇機發颺舉奏功浹辰間陞本省
左叅政以前在禮曹持議心固欲黜之冢宰擬擢佐
上副封執政執政愕曰朝列中有某耶冢宰遂徙佐
叅政貴州佐上疏乞解職養母歸佐生平裁正耿介
于鄉鄙切切善導推誠近人里有言輒求平于佐晚
益究心濂洛諸書從弟子講論不輟懸車二十年當
道累疏薦郡邑造請不就掃軌絕賓客之知嘗率鄉

人建臺塔以障水口旣沒祠祀其中所著有春秋傳義周易傳義四書語錄五經集義及它詩文

唐 臯

唐臯歙縣人正德甲戌進士第一人授脩撰與修武宗實錄錄成進侍講學士未幾卒于官臯名理宿學每爲文下筆立就或求竄改數語伸筆直書較前稿不襲一字人咸服其才惜未究其用也

汪玄錫

汪玄錫字天啓婺源人七歲能口占詩學士程敏政奇之占籍休寧舉正德進士選給事中與權閹悍帥

持同異每有非分邀請章下亟駁奏不可兵部論偏頭關功得大賚陞蔭有差玄錫疏斥本兵王瓊以下有過無功又陳保治遼東三衛之策人皆趨之時

武宗衛行一日趨幸昌平宣大率同列屢章極諫及宸濠亂武宗南征上疏力爭濠平車駕留幸南都

復列章言二十事世宗卽位玄錫首疏陳先朝群奸蠱惑基禍宜付法司定罪以昭顯辟時亟行之陞大僕卿以同牧事忤相張孚敬會廷鞠大獄以直言忤旨被廷杖罷歸十有四載召復其官擢都御史巡撫江西入爲戶部侍郎卒賜祭塋贈尚書遺稿奏議

行于世

潘旦

潘旦字希周婺源人正德進士授主事時奄瑾招權預度支出內無所徇典漕真州值寇發輸納不廢守漳郡民立碑頌德補任邵武時有鎮市二巨璫假上供攫民旦至首裁抑之興教蒞政郡民立祀以都史鎮鄖陽再平劇寇魁上嘉之賜金幣歷官刑部侍郎時宗伯夏言旦入相爲所昵者求貸罪旦不聽後提督兩廣會安南亂上命毛伯溫征之安南遣使求貢當事者抑不以聞旦上疏宜從所請不報旦卽

上印綬乞歸旣而卒用旦議旦愷悌寬重喜怒不形居官持大體而操履方正及卒詔贈工部尚書官給塋祭邵武舉祀名宦徽祀鄉賢

潘鑑

潘鑑字希古婺源人初家食與從父今少司馬珍兄少司馬旦弟僉憲選更相切磨篤志績學年十四代父兄執門戶役上書縣令令試其文奇之旣領應天鄉薦登正德戊辰進士授南京大理評事歷寺副正福建按察僉事丁內艱復除四川改浙江僉事陞貴州按察副使丁外艱復除河南信陽兵備陞四川按

察使改山西陞江西右布政使四川左使都察院右副都御史巡撫四川遂改工部右侍郎督木巡撫兩廣初在閩有寇蘇秉規糾亡命稱大噠哪據海島爲患鑑分巡其地討平之南安盜起攻仙遊城將官受檄逗遛不進乃自擐甲檄興泉民兵伏其歸路邀斬獲殆盡福州戍卒作亂勢猖獗鑑設方畧擒捕會邵武卒亦叛則單車馳往諭之而叛者始定於是名藉藉起撫蜀以諸縣衛賦輕重無等吏緣爲奸爲畫一法著之令甲賦賴以平鹽井麗江兩酋相仇殺乃約雲南撫臣持檄諭之卽解請內轄關南寇馬興率衆

通蜀境蠻落十五寨咸負山谷相結爲援密授總兵等方畧以兵塞諸要遂帥精騎擣平其巢事聞賜白金彩幣公在蜀久知地里險易察於民俗之宜周知夷情之變凡撫循安輯通商便民及詰兵控夷之政大者驛聞小者按舉論者謂有張乖崖之風督木事完奏言湖廣川貴諸府其民疲於採辦困憊不得息請量議蠲復朝廷從之兩廣之起上意簡在特重用之而弗祿矣鑑儀觀修挺性夷易不爲危言激論而耿介壁立不可干以私治官如家恭勤潔白之操始終一致焉享年六十有二訃聞賜祭塋贈太子少

保謚襄毅

張芝

張芝字廷毓歙人幼師邑博士海陽周成得聞正學時方童丱被服儒術造次不設媚容成重之呼爲益友弱冠舉正德進士觀政刑曹諸同曹詩酒取娛而芝獨研精書獄不出授大理評事上章皆關國家大計多見施行正德中閣瑾顯國芝言事極詆之已外補僉事丁家艱居喪廬墓起督學西廣爲一編書條刺伊洛微言導示教本務獎士節振集詬之風會蒼梧徭僮反監軍討之徭匿深穴中以計盡其矢石舉

種就俘尋得疾乞休不許擢荆南副使命下卒年四十一無子芝家故貧守官廉苦一介不取身歿之後夫人仰給縣官佐食芝雅志師法聖賢常以天下爲任其奏疏前後亡慮數十章皆崇論確議有以非言官止之者答曰一職所效有限言而見聽惠益良廣他不足計也與蔡祭酒清楊侍郎廉善及死介夫悼之曰廷毓死天下之人無福所著有宗祠考經緯書易講草經世續卦及大理廣西諸志奏議詩文若干篇

曹深

曹深字文淵歙縣人都憲南峰先生子也生有奇質
方四歲母歿卽知哀痛如十數歲兒稍長誦習小學
諸書日記數千言事繼母周尤極孝敬周病嘗祈以
身代之父遣之師事岑山程先生求聖賢之學卽知
居敬窮理用心於內及爲舉子業輒出人意表弱冠
遊郡庠與沙溪汪以正爲莫逆交講學白蓮別墅造
詣日深時都憲公方知寶慶府屢奉書必勸以牧愛
爲急無怵禍福又曰大人清白蔭及子孫後必有食
其報者他勿計也正德丁卯舉應天鄉試經魁明年
卽登進士時宦官八黨方熾而劉瑾尤橫遂率同年

白人抗疏乞 皇上總攬軋綱以正瑾專權之罪有
旨罰跪午門前者五日時方酷暑而素體弱自是益
羸瘠矣已已授南京兵部車駕司主事於是南峯先
生卽以其往日所寓書次第授之曰兒惟不忘乎事
我者以自處吾無慮矣親友聞之咸稱曹氏父子之
賢蒞任卽裁抑進鮮快船及舉行清理屯田數事部
尚書甚器重之方望其遠到也時汪以正適業大學
染疫疾鄉人莫肯往視馳至其居躬治湯藥與同起
居者半月汪病亟泣曰吾僅一女奈何曰當聘爲吾
兒棟婦君後事有深在無慮也卒皆如其言然竟染

疫疾於是年十月一日卒於留都官舍距生年纔二十九歲也自大司馬以下哭臨皆盡哀

程 昌

程昌字肯言祁門人甫冠領弘治鄉薦謁楓山章懋于南都授正學歸登進士授蘄水令時逆瑾有事湖湘官校絡繹徵索昌不爲怵舉最爲御史陳十事

上嘉之駕將南巡率同官伏闕二日諫止巡按福建會南靖羣醜猖獗率兵討平之詔慰勞陞一級繼巡廣東殄滅新會新寧劇賊賜白金彩幣在臺九年風裁獨持如一日銓註有曰八閩兩浙已著激揚之績

南靖寧會尤彰擒勦之功嘉靖元年與郊壇監禮及侍經筵議大禮昌援經典數千言歷湖廣四川按察使謝政歸閒居二十年餘惟闔戶著書未嘗一刺候公門歷官雖久不置妾媵財貨無停蓄所著有和溪文集發蒙近語大學古本註什宗譜家規等書今祀賢祠

葉天球

葉天球字良器號硯莊婺源人正德甲戌進士授戶部主事監太倉時內宦憑勢橫虐縱卒侵漁或毆捶運官球縛卒寘于法以理折服而又革奸社弊咸服

其公明 武廟北狩車騎數萬芻糧告乏卽馳至部
中畫招商之策部尚書石公亟從其議而又拒權勢
之請絕冒中之人民商樂輸供億不缺一日榆河百
騎突來卽駕蹕也伏謁道旁時 武廟方厭接文臣
遣騎來詰騎回奏曰乃管倉主事卽昨疏請回鑒劾
太監郭某而軍中所稱芻糧平者也 上釋不問未
幾郭聞果以貪敗歷員外郎中出知東昌府比至首
舉常平法豐歛凶散儲粟數萬次立團甲法十戶爲
團團有長凡丁業出入皆有籍稽次立三役均派法
上役重者移中役中役重者移下役下役輕者移中

役優役濫者還本役時歲大侵饑民就食者分處以
隙館空宇發儲粟捐緩金募勸貸尪瘠者予粥能動
履者與糧不能給朝夕者與穀全活無算郡北有減
水閘以洩三邑流潦入運河者也歲久閘圯淫雨漫
漶廣沒民田至是復修建之而水患以消嘗讀歐陽
公隴岡阡表感所書求生事揭之座右以自警惕故
庭無衆牒獄無冤囚盜賊屏息以悼異超擢四川左
布政卒于官

馮靖

馮靖字寓安績溪人正德中以鄉薦授臨城教諭陞

監察御史時陝西罕東等番以易茶馬而譁朝命靖
帥兵往相機宜夷民咸裂口咬指而服歲乙巳閩寇
鄧茂七授首其黨吳金七等據政和稱僞號承命經
理其地設奇擒獲械送京師陞浙江按察司僉事適
有賊酋鄭懷茂等大爲民孽督兵勦滅尋陞本司司
使懇疏乞歸卒于家

胡宗憲

胡宗憲字汝貞績溪人魁梧修體負大畧由進士宰
益都餘姚擢監察御史行邊遇倣報卽先衝往禦按
湖浙皆有能聲倭寇犯浙更數閫帥屢挫是時宗憲

當入闡柄文校士辭不入乃往平賊戰於平望王岡
涇等處屢奏奇功 上嘉之進僉都御史尋進兵部
左侍郎總督江南北閩廣七省兵馬皆 上親擢賊
渠首王直徐海最雄桀宗憲謀直以弋海因取陳東
縛麻葉收張璉復購陳東餘党蹴徐海于沈家庄與
官兵夾而盡殲焉倭寇悉平東南賴以寧息加尚書
少保所賚賜甚厚蔭子松奇錦衣衛千戶宗憲倅儻
濶達奮身先士卒臨事有成晝初議受徐海款衆以
爲非計謗議朋興毅然行之及海至中外戒嚴諸閫
帥失色宗憲以手摩海頂顙諭之如擾羊豕人服其

氣宗憲性夷坦踈脫不自檢飭以人言兩逮至京
上念其功釋之尋卒于京師所著有三巡奏疏督撫
奏議平倭奏議籌海圖編行于世

朱永寧

朱永寧字孟康歙縣人進士由行人選授山東道御
史識沉材練能諳政體凡所建白咸閎切時務巡按
北直隸時虜薄河間府督兵禦守隨機調應凡七晝
夜鬚髮盡白城完加僉都俸卒

汪道昆

汪道昆字伯玉歙人兒時讀書知大義卽厭薄時習

嘉靖索韜鈴左史間擬作多奇語補郡博士弟子學
蓋進聘于吳將婚而女瘵或語且勿逆婦正色謂柰
何生而死之令無所歸卒逆婦婦尋歿嘉靖甲午舉
于鄉明年成進士時年二十三夏文愍當國慕其才
欲處之中秘諷所善一見謝不往遷義烏令廉儉平
恕大得民和嘗宵夢練衣人憩簾下旦里正白婦自
經者詰曰夫非貌寢而衣練者耶廉之竟抵法境以
爲神他異政類此進戶部主事改職方歷武選郎咸
舉其職時歷下李攀龍東吳王世貞爲文章倡和諸
名士皆守曹郎相與脩西京大曆業則無不傾重道

昆其文日閔博力追古作者海內知與不知咸稱慕
之出守襄陽政多德惠人以比牟祐山濤會海寇躡
閩浙忌者以其優文紬武推閩副憲備兵福寧欲以
困之至則討軍實脩戰守具悍卒以庚癸譟脅開府
者馳入軍數責之衆憚服不敢動戮首事以徇令始
肅壬戌倭據閩橫嶼爲巢沿海城堡相繼陷興化府
城亦陷全閩大震將軍戚繼光將浙步兵八千赴援
戚有良將才道昆一見與深相結運籌決策先後蕩
掃賊巢收復郡縣城堡鹵斬三千餘級奪回男女輜
重無筭倭自是不復向閩幕府上功狀首列凡四受

白金文綺超擢按察使特勅盡護八閩軍旋晉右

僉都開府閩距爲守僅三匝期當是時道昆功名盛
一時卽忌者亦心折其文武畧無以難也海寇劇賊
次第芟除勞來創夷閩始大定以人言請告隆慶庚
午起撫治鄖陽旋進副都撫楚鄖楚之治不異閩進
兵部右侍郎閱視薊遼酌額餉裁浮費歲省二十萬
有奇萬曆癸酉轉左侍郎籌畫鑿鑿實效其議輔兵
疏尤切至計時江陵柄國雖同年友意不相下遂請
終養歸奉父母數年盡色養親喪哀毀踰禮撫弟道
貫竭友愛考績任子推與弟弟病痿卧起與俱出遊

必昇從復始祖墓考建祖廟脩十六族譜葬故師方
喪而養其嫠孝友碩德鄉里服之爲文高擅一世與
王弇州並稱人推當代文章第一晚號函翁將著函
三子取三不朽義上揭性命下要百家之
歸未就卒所著太函集副墨若干卷行世卒年六十
有九論者謂其文章高古功烈炳烺節概表于立
朝淳德孚于鄉黨蓋實錄云

鮑道明

鮑道明字行之歙縣人嘉靖甲午舉第四人戊戌舉
進士授行人三歲進戶科給事中再歲進左給事中

守進刑科都給事中當是時信州袁州爭政言者率揣摩希望各中其驩其或浮慕骨鯁之名排擊紛起獨止色中立或以言責詰之謝曰主德聖明臣愚不足以奉明詔如使株連毛舉徒自託於直言臣雖愚不欲以此傷大體會御史奏延綏失事巡撫都御史以捷聞先帝命兵科右給事中蒞視之尋奉璽書往徧歷塞上閱虜出入諸鄣塞亡人畜多寡有差按軍府部署方畧較諸將程期論罪輕重覈首功虛實策賑濟防禦諸便宜議上多當人心無枉撓聞者謂千鈞一發飲羽虎狼無問狸狌往矣先是虜入上谷

上言匈奴日伺邊必求再逞乃今易置宣大總制用
翁萬達易置本兵用唐龍萬達方撫關中不得代宜
未卽至龍以終養去母在宜未卽來假令稱兵其何
以應倉卒按 祖宗法宣大設總督軍儲侍郎一人
貳總制京師設提督團營尚書一人貳本兵分任事
權相表裏無事則戮力共濟有故則可攝而代之復
之便當事者計非急持兩端其後虜犯京師卒用其
議在近侍七年出入惟謹卽有不測獨由由然應之
袁州中信州 先帝怒甚收信州及建議復河套者
併逮言官杖之廷道明頓首曰臣固當答謹待罪出

而叅知江西政事居頃之罪囚王連遣子叩闕上書
誣執故都御史胡纘宗誹謗故人大辟辭連刑科以
故刑科都給事中當就對簿 先帝怒甚人人自危
道明頓首曰臣固當誅謹待罪及事釋卒未嘗以喜
愠示人既畢親喪補山東職如故大盜師尚詔起歸
德趨山東以部子弟戍滕嶧間武備甚具賊遂卻尋
受擒以保禦功賜金論賞進浙江按察使浙當輻輳
之衝鄉人往來部中趾相錯部中權豪多關說不避
惠文戒閹者毋入鄉人謁毋入關說者書卽權豪面
謁欲有言曾未得一開口既又發臨安故給事中高

時奸狀械送京師無何進四川右布政使以採木論
賞復賜金無何轉雲南左布政使時多徵發民將不
堪愀然曰滇卽小饒直蠲濡耳蠲不轉則活轉則中
乾此誠藩大夫事乃會計全力什五自給什三轉輸
什二備歲凶他不意令旣布滇人至今便之已未入
朝麾筦庫羨餘弗納尋進應天府府尹已復進都察
院右副都御史巡撫貴州貴州吏部錯居故患盜殿
最捕盜諸吏士視獲盜多寡爲差諸吏士或掩不辜
求逭簿責公遇文致不辜者立釋之阿堂攫印構兵
楚蜀騷動謂苗視印爲向背請降新印令反側子自

安母勤遠畧爲也容山西韓甸竊發徵兵遣將討平之斬首二百有奇甸就縛事聞賜金幣下兵部論功人言歲終類奏功故事猶得任子今大捷宜視昔有加不然則籍子弟置有功部中亦得延賞謝曰臣奉天子威得罪人固諸將吏功臣何敢爲子孫地已進大理寺卿尋進戶部左侍郎賜金幣會袁州得罪去變置諸大臣乃進南京戶部尚書盖一歲三遷矣乘兵變後主度支體國撫軍士不遺餘力尋以疾乞歸詔優許之會兵部左侍郎棠樾鮑公致仕歸道明宗人也鄉人嚴事二鮑視漢司隸同歲朔疾風自西北

起占者以爲咎徵月將終兩公相繼卽世

鮑象賢

鮑象賢歙縣人嘉靖己丑進士選授御史出爲湖廣僉事部署江防以獲盜功陞雲南副使兵備用師嶺表滇南騷動象賢力沮其議累遷至右副都御史巡撫陝西越二年巡撫雲南平夷酋那鑑之亂尋陞兵部右侍郎提督兩廣軍務時山海寇盜縱橫出沒象賢設方畧勦捕斬獲幾二千級以功蔭一子爲國子生改南京兵部右侍郎尋免家居久之起巡撫山東尋陞兵部左侍郎以老乞休卒於家象賢爲人廓達

練事多大畧歷任三十餘年所至有聲時論稱之

潘 潢

潘潢字薦叔婺源人父鐸務學循禮動法古人潢得家學舉嘉靖進士疏請行郊禮授樂清令下賢人余昌之廬務崇禮訓徵入禮部進大學衍義勸經筵御講改吏部前後累數十章皆切至潢署選事冢宰欲私二人潢執不從左遷禮部尋督學閩中嚴明條搜市肆壞教書焚之招下縣童子聚學士之貧者賑之競進者必斥出教外爲諸生立輔仁紀業二籍請今少師徐公階故督學章公袞爲之師講明正學一時

士爭矜勵累遷至戶部尚書正色立朝素爲時相所
嫉以議條例不合卽上疏自劾曰徒有用一緩二之
心罔知隨時通變之術徙南工部尚書轉吏部再轉
兵部留守南都時巨盜師尚照起亳宋間潢分兵扼
禦壞其機牙爲北師所躡而希相旨者以玩寇論之
因上印綬歸潢貌不踰中人而守道守官萬夫莫抗
居常恂恂言不出口至矢謨慷慨必盡所懷對妻孥
親暱不妄一語居父母喪三年不御酒肉有文集崇
祀鄉賢

江 珍

江珍字民璞號漸江歙縣人嘉靖甲辰進士授高安令其政省科法務便民夫里在官悉縱還生業有事一呼輒至卽徵發無後期諸生朱誥豪邑中會傭人病死嗾其婦誣誥所憾黃約殺之廉得其本謀寘于法卽郡守力爲誥請勿顧也一邑稱平秩滿擢禮曹尋丁父艱改南京駕部郎會有新令詔所司毋濫給郵符諸有力者抵部尚書或以爲言正色謝之曰郎吏小臣奉天子明法奈何自公撓之卒不給出爲信州守會永豐紀崇以富賈叢怨適醉人殭屍于道移屍崇舍旁且爲蜚語云前守受千金故緩其獄珍

白其寃于監司前 天子遣使者按部中惟此三尺
法耳法不當守何敢輕傳大辟以遠嫌後崇事竟白
轉副使治兵饒州已復進浙江叅政先是游民聚族
採礦據西安銅山數寇新都珍亟請督撫發兵截賊
歸路悉殲之封銅銅山復請以浙東兵備兼攝徽饒
而嘯聚之患以熄尋進按察使轉雲南右布政會肺
病作投劾歸以貴州左布政致仕歸老拓地五畝闢
華黍堂屏冕衣裳杖屨出游率歲月一至漸江上愉
志自適以上壽終

程嗣功

程嗣功字汝懋歙縣人嘉靖丁未進士授武康令吏事精敏而存心矜恕每當讞獄嘗有法外之仁比及三年僅論徒一牘耳陞南職方時倭薄都城畱京震動嗣功居中調度譚襄敏出師禦之事平大司馬張公曰倭之却而東兩君子力也遷四川僉事治兵安綿龍川土酋隸部正副以權金爭利遞稱兵單車入采阻以大義責之其副來歸奉要束正猶跋扈乃擒首事十餘曹法之二姓革心其構立解進湖廣叅議尋丁內艱除服起補浙江復丁外艱再補貴州上酋安國亨內相軋開府王公力主征討嗣功進曰安氏

小有言則示之罰耳且彼內釁何至興王師彼恃險而多樹兵如不克奈國體何直指深然其議而開府卒自用師竟無功後乃嚴勅法令許其自新酋共命如初境內底定進江西叅政分守贛州編戶故與盜通舍耰鋤卽鈐棘往者率以事不密則害成中丞李公至因密告之乃潛師襲其巢俘馘渠魁以徇進河南按察使尋遷廣東右布政進廣西左轄宗藩缺祿有年往往群譟執券求補旣給歲祿乃以其羨者當左券而倍銷之宗人驩服擢應天府尹至則省費輕徭務與圻內休息時有逢掖父子逆婦而貧徧告庶

司誣以不女乃召諸博士立之庭正色而訊是皆博
士弟子寧以論財之故加處子以不令之名爾則非
夫吾不忍布之爰書以巖名教則皆慚服以好合終
焉進戶侍二載疏乞致仕歸

程旦

程旦字孟明歙臨河人登進士授戶部主事督明時
坊三草場通州五衛倉糧錦衣千戶柳天爵猾爲中
訶旦首裁抑之不敢復犯總理宣府糧儲宰相使人
言于旦欲超用之旦辭謝及陞兵脩雲南冢宰銜旦
爲譌奏旦曰予不由冢宰言進當不由其言以退後

陞按察使考驗土官楊訓陶炳獄土官故大豪立結
竟其罪夷人駭愕時議征安南陳十餘事其言多中
機宜陞浙江布政使夷民數百人號泣攀車追送未
之任卒所著有蘿山詩集滇南雜錄旦制行脩整事
不畏難孝廉方正之行尤爲鄉黨所稱

程廷策

程廷策字汝揚歙縣人始卅補博士弟子時中貴爲
上祈年于白嶽策率諸生長揖不拜比入縣謁先師
據坐命講策抗言 上英主烏有以魚朝恩掌國子
事且若奉命視工非視學也卒避席罷講以此知名

郡中登嘉靖癸丑進士授戶部主事歷員外郎中時
雲中告急諸軍待餉而譁上發帑餉二十八萬有
奇命策主運次甕城驛虜騎遮道邊塵蔽天乃連車
爲營環營爲塹衛士瑟縮偶語杖之百以徇行間卒
保完餉還報會神樂觀失倉糧當坐太常卿以下十
有八人策精于握算按籍核之則累歲耗當如是因
以其狀白尚書諸太常得免出爲辰州守入境則興
學校贍生徒勸農桑舉鄉約簡駟騶通仁居嘗以水
旱禱而雩皆響應郡故患虎爲文檄于神募力士捕
之患頓熄在郡三年百廢具舉學宮祠廨麗譙城郭

無不繕治而民不知勞未幾疏請致仕歸時年尚未
艾也當道通推轂之堅卧不起郡縣賓鄉飲率以疾
辭竿牘不及有司紹介不出境外卒之日一市童卧
病呻吟見一皂衣奉簡書迎使君儀衛甚都方呵喝
誼譁又一皂衣者至大呼曰使君駕矣衆甫寂然而
其家哭聲起矣童乃甦

程 金

程金歙縣人嘉靖癸丑進士授南京工部主事筦庫
藏往筦庫者爲諸郎具竿牘具贖錢金先自屏一牘
一錢無所取給諸郎以例來索則自出諸官中應之

由是諸郎目攝之罷勿索出督儀真廠兼視漕令諸
閘啓閉必以時諸沮撓者繩以法有御史至輒欲卽
啓不可則撻役夫金卽縛其舟人狗之市後乃無敢
干者江西大賈豪於儀真會督府徵蠻兵至諸酋長
主其家豪爲集舟載兵境內騷動市人訟于金令捕
豪抵其鄉人萬考功書爲請卒收豪以徇丁巳內察
考功署以浮躁謫判長沙已貳河間再人爲戶部郎
中久之出守漢陽其嚴出入操法令猶然向者郎戶
曹時不少假貸會上計銓司肺病作輒投劾歸年甫
及艾耳自漢陽歸里惟是先人之四壁在旣困自支

復苦諸兄弟子不給而操行愈凜履不及縣簿之門
車不及城市弊弊課田塍而躬督之竟貧約以終其
身焉

汪一中

汪一中歙縣人登嘉靖進士由郎署出爲江西按察
司副使辛酉聞廣賊入江西諸郡薄泰和一中從宴
會間聞之輒投箸起曰虜鼓行而西掩我不脩不蚤
計謂蒼生何當路遂以平賊屬之先是巡檢劉茂力
戰死賊怒磔其屍比至泰和帥諸將吏祭茂曰爾職
抱關猶然死疆事吾待罪方面不滅賊吾何獨生遂

誓師列陣而鼓之進獲俘者五徇于軍中旦日陳如
前一中從中軍鼓之進謀者謂賊張甚莫如堅壁以
待叱曰虜深入我境亡能以一矢相加何謂虜張我
寔張虜我師左次彼且益張江以西危矣士死綏將
死鼓業在行間義不避死鼓之更進而左右軍遇賊
皆奔賊悉赴中軍中軍亦潰一中躍馬而前當賊鋒
關弓射殺二人手刃一人而左脇中槍者二臂中刃
者三乃死一中妻聞訃投於井家人出之喪至卒不
食越五日死事聞詔贈光祿寺卿廕一子世襲錦衣
百戶給祭葬謚忠愍仍立祠郡城東春秋有司致祭

贈其妻程氏爲淑人

許國

許國字維楨號穎陽歙縣人嘉靖辛酉舉南畿鄉試
第一人報至而父已卒踰年母亦卒痛兩尊人劬而
不及食其報哀毀甚服除卒業死陵山寺有兩青鳥
飛鳴其前移時乃去僧言此碧雞也相傳唐李翰林
自蜀携來者我明惟舒梓溪狀元一見因出所藏圖
繪示之爲賦碧雞篇意頗自負乙丑舉會試第七人
選翰林庶吉士日鍵關冥搜迭覽究心經濟之學杼
爲詞章閎深典麗館閣稱詩文兼擅所長者罕儔焉

隆慶改元授翰林檢討奉詔賜一品服使朝鮮成禮而還饋遺一無所受獨使輅所過覽勝觀風間有紀述若皇華集弔箕子謁壇君諸作迄今爲其國人所傳誦焉辛未春分校禮闈夏使益藩壬申神宗出閣講學以國兼司經局校書萬曆改元自編修陞右春坊右贊善時上日御經帷無間寒燠而國齋心夙夜勤恪視儕輩有加比進講儀容周慎音節鏗鏘託事獻規曲盡忠欵上每悚意聽之手書責難陳善大字賜焉甲戌秋典試武闈丙子秋典順天鄉試所收文武士並稱得人頃之陞司經局洗馬兼修撰

預修兩朝實錄書成咸蒙敘賚戊寅遷南國子祭酒
庚辰轉太常寺卿領國子祭酒事教士務在長育成
就之士樂其寬不督而勸已擢詹事府事兼侍讀學
士仍直講惟其秋改協理詹事府事充會典副總裁
辛巳陞禮部右侍郎尋轉左兼官直講如故癸未春
典會試夏簡拜禮部尚書兼東閣大學士入贊機務
尋從上考卜壽宮晉太子太保直文淵閣與之誥
命甲申滇南獻俘以決策功晉少保直武英殿丙戌
一品滿加少傅兼太子太傅予誥廕國念父母厝淺
土未葬疏辭誥廕而請卹願歸襄窀穸之事詔予祭

葬命其仲子代行踰年會典成晉吏部尚書己丑春
再典會試時文體寢壞所錄制義粹然一出於正諸
引用釋老言離經叛道者卽才藻士咸擯弗收士稍
懲其陋習焉尋以一品再考居政府九年代祀先
師孔子者二分獻南北郊者三誥贈三代任子者四
其他以扈駕閱工應制賜蟒玉銀幣諸恩數率優異
不可勝紀國亦感激 上眷知孳孳以獻替爲己任
初有摘科場事語侵大臣者請辯邪正以定國是謂
昔之專恣在權貴今乃在下僚昔之淆亂是非在小
人今乃在君子又言大臣猶梗柁也宜取其閱歷畧

其寸朽言官猶江河也宜導之疏通息其風波時以爲名言然自是忌者彌衆數交章詆之每疏辯輒自劾免上特嘉其忠謹數譴言者勉畱之國言畱臣譴言者是速臣之去也則復力救言者往往得解臨洮之變首輔欲俟虜王回巢專力以制火酋國憤欵虜助逆則欲並剿以圖大創又嘗言戈矛不在敵國而在轂下安機不在兵食而在紀綱其持論慷慨引大義類此升儲之議自庚寅元日上召見閣臣于毓德宮權皇長子膝前命閣臣諦視諭所以保愛之旨而是冬國以三事進規其一冊立深以不得所

請爲慙疏畱不下已乘間請于 上有詔明年春舉
行冊立戒羣臣勿謹方靜以待命而主事某之疏上
矣 上果不悅遣中使詰閣臣奈何與郎署小臣比
國以是不自安旬日而上書乞休者五 上重違其
志予告給傳以歸歸攜二三者舊徜徉山水間所至
易村醪市脯與田夫漁父接席相飲餐置往事不啻
遺跡然燕居深念未嘗不以國事爲憂及聞太倉公
請豫教而始一色喜猶認認慮後事曰吾卜其始矣
未卜其終也未幾 仁聖皇太后升遐哭臨於斗山
書院山高風烈一再宿中寒以歸遂不起國貌溫氣

和襟宇冲曠與人處若谿若谷靡所不涵納而其中介然有以自守方在館局甚爲江陵公所器重江陵父病朝紳醵禱獨不往尋以奪情畱任衆或露章攻之特削贖藏袖中詣其第密勸以行服卽見忤終不以其故告人也南中司成缺江陵問願否曰賢關地重司成道尊懼不任耳敢云不願旣之畱雍亭當遷者數矣而不及或怪問故曰資宜爾也至再則曰俸宜爾也深厚不伐如此

張一桂

張一桂字稚圭別號玉陽歙縣人幼警敏自喜爲諸

生治文章有聲年二十餘爲嘉靖辛酉遂舉于鄉戊辰成進士選入爲庶吉士卽有志經世之學與同舍郎下帷講業自古文今文以至國朝掌故亡不蒐獵其實而涵茹其華庚午授官爲編修壬申持節冊封德藩禮成還報甲戌分校禮闈又嘗預修 穆廟實錄錄成而晉一官爲修撰賜白金文綺賜南宮宴乙亥補經筵展書官兼掌誥勅丁丑 世廟實錄成復進侍講宴賚已而選直起居注時則江陵相君奪情之議起同官以抗疏得譴上章力救章寢不報遂拂衣去迨壬午江陵歿始還居禁近是歲再充經筵講

官及分修大明會典甲申擢爲右春坊右諭德仍兼
侍講乙酉充日講官嘗以 聖節從輔臣後拜 上
賜有差其年錄士順天與南充陳公典厥事會浙士
有以詭籍預選而中貴人子弟多被黜落乃爲蜚語
中之得 旨調南京兵部員外然桂任柄文不任覈
詭籍法不當調卽調不當郎司馬亦竟不自理也趣
駕之畱都諸省郎則皆異避亡敢與爲顏行而顧與
之罄折委蛇無少幾微崖異之色尋以使事奉母安
人還里戊子擢南京國子司業次年卽拜南京祭酒
辛卯入爲太常卿管祭酒事未至復遷南京吏部右

侍郎壬辰秋改禮部右侍郎兼侍讀學士尋又轉左
時業已抱疾疾行至永城遂不起所言不及它唯以
不及報 上恩及終事母安人爲恨距生得年五十
有三耳

程默

程默字子木休寧人敏識強記魁梧磊烈有奇氣縉
紳交口稱譽之弱冠補博士弟子受業方伯羅山公
講戴禮已乃博習易象春秋古文尚書游學玉岐金
焦間聞陽明王公名負笈千里師之逾年有得敘華
近裏嘉靖乙酉舉明經卒業太學間從大司成救月

中府禮度嚴整不以暗昧少替同舍生大異之戊戌
下第吏部銓選第一時除廣州府同知廣嶺外望府
守倅頻闕詔征安南兵興費鉅默從容調度民不知
困甫至謁先聖畢昌言風俗波頽獄訟蝟興皆斯學
不講之故亟請祀開府陽明王公之功巡按御史以
爲知大體特薦之黎負險憑陵崖中世爲害建策乘
勝畫五指山爲十道分官據險錯居民於其中徙黎
山外不數年且爲衣冠之域當事者不欲久兵中止
士議惜之行部禁掊克慎勾稽身先吏卒所至肅然
嘗承臺檄閱實韶州庫藏守別蓄萬金啗之以爲已

地默廉知之卽疏始末議立法防侵盜監司躡焉故
新會令何某以不善事上官被斥默上其賢必追復
乃已竟以是忤時罷歸道出南贛都御史秋崖朱公
最少許可尤器重之以不見疏用自歉厚爲之禮而
送之居家不跡公門雖所知恥託以子弟曰徒賊之
耳晚築天和亭種樹千本悠然從東廓羅山諸名流
講學修德期百尺竿頭更進一步疾已亟猶人授子
姓一經曰後當從此中尋我莫視爲陳言也以嘉靖
甲寅卒年五十有九

莊英

莊英歛縣人舉嘉靖乙酉鄉薦授廣昌令多善政偶
劇盜入境櫻城肆掠英挺身捍禦遂遇害事聞贈建
昌通判錄其子爲太學生

吳成器

吳成器休寧人始仕會稽典史當海上寇初入內地
以能將兵知名於是承大吏命提兵守水陸阨塞歷
浙東西南直隸與賊遇大小七十餘戰斬賊首數百
級生獲數百人獲所掠子女并衣械無算凡戰之處
休止督發設守出闕咸有方畧禁士卒無毫毛擾居
人又能舍死先士卒民多其功往往就所戰處爲建

祠刻石今曹娥江其一也後累軍功歷官大同總兵
掛平虜將軍印

江東之

江東之字長信別號念所歛縣人萬曆丁丑進士爲
人魁梧倜儻初仕行人輜軒所至咨諏詢訪不遺餘
力旣官御史勃勃有埋輪志時姦人徐爵者江陵馮
閹皆倚之江陵外言非爵不入馮閹內言非爵不出
爵又以獨計令兩人交疑且交驩兩人者不得而測
其倪嚴事之夜至禁門守衛者不敢訶問江陵死益
橫無忌乃疏爵不法狀上怒而下爵理滿朝震悚

於是疏保者疏江陵逆僕逆黨者紛至而城社肅清
矣於是益感激恩遇知無不言疏王中丞宗載陷御
史劉臺事王得戍去是時王方掌院事東之以副封
進王笑曰枉史何言亦笑曰爲死御史鳴冤王曰死
御史者誰曰卽公王踉蹌歸邸舍待罪至今烏臺譚
之猶有生氣然人人目攝之矣奉 聖書督理屯牧
畿輔畿輔人聞江御史名多咋舌去會虜蹂躪黑谷
關邊臣及諸帥掩諸骼以功聞爲按臣李植糾發
上命輟屯政往蓋異數云重臣復有爲邊帥地者曰
東之生平不敢負國欺君亦不敢故入博名高說者

慚而退至則諸掩飾詳密無所得間乃佯出郭外觀園蔬青映人立命健兒取畚鍤耒掘蔬下窖死者枕相藉而創痕尚血漬未乾諸將始伏辜竟據實報坐諸將死邊事大振丁御史此呂叅江陵科場諸作奸者海豐楊冢宰謂御史言過具疏叅御史外謫東之適自塞上歸懷袂起曰十年來以賢書爲奸藪者人知之冢卿獨不聞乎亦具疏叅楊輿論直之時奏疏最多請蠲請賑請免徭役及禁私官每疏出都中爭相傳頌上無弗納也有詔江東之盡忠言事可嘉其特擢以彰忠讜晉光祿少卿陞太僕寺卿是時諸

官輦轂下者皆江陵舊人多回面內愧又恐人暴其短從旁椰榆諸少年不察遂有曹起而擊賜環諸君者矣東之曰諸臣無罪言江陵與不善事新貴人其罪諸臣可議臣請與俱罷人遂以黨擊之乃力求去上使使至皇極門諭留亡何又言大峪山事益群起而攻之左遷職方員外郎出知霍州病免歸上手詔起知鄧州陞僉事備兵沅州尋轉南光祿少卿入丞大理晉左少卿署卿事所平反甚多會與銓曹異議陞僉都御史巡撫貴州擘畫多大猷首議建天柱銅仁二邑擒烏撒酋平高寨苗俘獲百餘人上聞

賜金帛有差播酋仇五司五司在黔門庭中日苦殺戮東之以赤手枵腹鼓舞數千兵士卽不支乃其心在報國也而諸臣未履疆場乘其致仕以文墨繩之得削籍報遂飲恨死

吳應明

吳應明字以誠號懷溪歙人少學當冠父命之田間冠應明請受儒冠識者知其志不凡入成均萬曆己卯魁鄉試庚辰第會試選安福令視事當九月或以陰陽家忌言者曰令求不獲戾民社耳遑計其他爲令孳孳教民著教養錄從先錄頒之里巷葺書院

集衣冠講道其中邑三被災拊摩捐賑禦之有方民
以全活有荒政要錄壬辰擢戶科給事中尋右兵科
會倭夷侵我屬國兵數敗當事持兩端應明力抗封
貢之失策倭猾酋小西飛來奉 旨庭詰之諸人問
難不能屈應明折以數語始屈復數本兵辱國于朝
播酋亂起疏言山峒不易用兵當攻其心請陳師境
上諭歸命待以不死則兵可無血刃論者韙之甲午
遷戶科左典浙江秋試得士爲多尋轉工科都給事
請減陝西織造費百六十萬得從半減乙未轉太常
少卿假歸遭母喪里居八年卒生平雅重大德尤厚

于倫紀享年不永一時惜焉安福人祠之名宦

吳宗堯

吳宗堯字仁叔歙人少屬文有奇思試輒冠多士萬曆戊子舉于鄉乙未舉進士除益都令益都衡王封國爲青州府附郭事繁而民悍始至百廢具舉詞訟寢息學校人文一變時中貴陳增奉璽書采礦建牙益都勢張甚宗堯抗不爲下增逮諸富民誣之盜礦三日逮至五百人日發邑千人取礦民多畢命于杖下宗堯發憤具疏五千言列增罔上營私剥官毒民詞義凜烈拜疏日爲文禱于城隍以祈必行增聞

而懼與其黨相持泣乃謀輦金賄左右以免禍上
得疏心動科臣先後復條增罪上謂增不體德意
姑記過以觀其後增復誣辨上奪宗堯俸已而撫
臣疏其無罪上乃奪之官而增復重誣其匿稅多
取購其鄉人無賴使妄證實上乃逮宗堯下鎮撫
司問尋付司寇獄而益都民欲殺增者洶洶增恐徙
徐州會下山東案其事多不實後竟放歸辛丑壬寅
以恩詔復官旋卒宗堯孝友長厚孚于鄉黨爲令
五月不避禍難抗章鋤惡以爲赤子請旦夕之命卒
使虐閹喪氣遠引亦烈丈夫也

潘士藻

潘士藻字去華號雪松婺源人萬曆癸未進士司理
溫州徵授監察御史巡視北城有二閹闌出宮門戲
良家女婦干擷者執之群閹而奪之去乃移文司禮
司禮以聞上怒曰東廠職何事而事自外廷發耶
命杖二閹斃其一自是諸中貴洵洵思必報而大璫
職東廠者亦以故銜之屬以火災陳言乃共摘疏中
語以激怒上謂歸過賣直幾欲杖之廷竟落三階
調廣東布政司照磨壬辰晉南吏部主事尋改尚寶
丞士藻旣以謫粹起爲中朝所屬目又性侃直覩時

事輒扼腕不平權有力者每思有以中之會欲調之
吏部曰是禍之媒也辭之極其堅決乃晉司少卿意
已倦游方擬陳情奉母宜人歸養而竟以疾逝得年
六十有四

潘絲

潘絲字朝言婺源人爲人倜儻負奇氣狀貌雄偉音
吐如洪鐘少讀書飛布山攻苦力學足不踰戶限一
日自念曰士不兼文武不足任重吾齷齪老此奚爲
間走燕趙吳越從四方賢士大夫遊已復閱武經古
陣法旁采將傳星曆風角諸書躍馬彎弧慨然有鞭

捷四夷之志矣嘉靖乙丑浙東礦盜起糾合數千人
抵婺放兵四掠指揮王應禎等死之時賊抵屯溪絲
曰賊渡河將爲一郡患乃率兵邀擊于河與劉會者
六人拏舟抵賊岸緋衣者跳跟出知其魁也射殺之
又挑其尤桀驁者數人射殺之皆相顧愕眙稍稍自
引去明日賊奮兵出戰旗甫出射之仆我軍驩聲動
天人人氣自倍渡河大破之又明日伏烟村渡邀賊
歸路前後八陣而所向無不意得者賊盡殲於是守
令以其狀上之督學御史超格貢之選嚴州府別駕
署篆分水縣縣喜訟大者斧斷細者縷解吏從旁證

視不敢吐聲氣又丁戶多浮額鈎稽故牒去虛丁以
千數頃之移攝建德蠲歲徵八百有奇刊爲額下之
鄉民一邑雷歡賢聲籍籍于遠邇矣會部運長安邸
日拜走仰望階下鬱鬱不得志疾作嘆曰吾上不能
高卧巖壑自全天眞次不能感會風雲雨澤萌庶外
不能策勲龍沙之北內不能批鱗人主之前而溷風
塵以死也因上書自免已而陞北勝州知州投劾不
赴明年疾竟不起五十有六已耳

程振

程振字玉夫別號樸翁歙縣人生有至性髫歲失妣

號泣甚悲人不忍聞長事父文旻翁暨繼黃益盡誠盡敬二弟揮揚及諸婦則之罔敢少悖嘗有事於浙得父報病劇卽兼程而歸行且禱願減已年以增父壽及歸相抱泣曰幾不及相見矣喜不勝悲病益劇醫者弗藥計無所出遂刲股糜心竊語曰古人曾進此愈疾効之當驗也疾果愈時翁年六十有四自是神完體健齒髮更生至沐恩例之榮凡一十七年人以爲誠孝所禱也未幾患溺艱於起居振躬湯藥伺燥濕旦夕不離寢所者三年旣而捐養呼天泣曰某何獲罪於天以至此耶哀毀過禮每不自知父柩

初厝車田距家五里許振以爲孤寂暮必往寢其側
諸子患之請移柩祖墓傍始歸以地下有侍也九載
於茲語及平生未嘗不墮淚先是振侍疾時家有戾
猫犬一旦化而相馴及居喪庭花曰紅金錢者忽變
白如玉人又以爲孝誠所感因著之以爲勸云

謝用

謝用字希中祁門人其父永貞因嫡汪氏無出納妾
馬氏生一女永貞客外嫡苦之姑氏不得已還其母
家改適乎溪不知馬氏已妊四月矣月足妊生卽用
永貞抱歸寄乳鄰母孫氏囑曰此離蚌之珠也幸善

保之嫡聞之遂自妝而鞠之踰年嫡生同愛無厚薄用不知其異出也十五習舉子業善屬文嫡慰永貞曰有此可忘蚌矣永貞意終不釋用甫冠始知其爲馬所生恐拂嫡意乃謀於族人名珣者密詢之則又改適不知其所矣用曰弗得吾母弗已也遂因事與珣偕行日則哀詢於路夜則焚香以籲天如是者幾一載千里之內水村山郭覓之殆徧弘治壬戌孟夏望日暮宿林寧黃畬農家一寡嫗出問曰子爲誰用告以名氏及尋母之苦曰汝母爲誰曰馬氏曰汝非永貞之子歟曰然嫗卽抱用曰汝母卽是我也於是

子母相告故悲泣不能已聞者皆爲之揮涕明日歸告其父語未訖仆地旣而得命乃并其同母弟余浩迎歸別室以居用敬奉二母曲盡其誠撫二弟恩愛俱至乳母孤用養之不缺親族朋友咸稱之嫡卒感悔令用迎馬同居無間言焉嘗語其族之女婦曰用善事我無懟心誠孝子也必食天報一日鄰不戒火延及數十家至用舍風反無恙其父墓木拔勢西壓祠屋用懼急趨之木急東墜祠墓亦保無恙人以爲孝誠食報之驗時用補弟子員觀風使者聞其事列於德行優等月餼之廩糧

陳倫

陳倫字斯常祁門人性警悟少從宗伯康先生受春秋作文有奇氣倫亦自雄其才銳意遠圖適二弟繼殤家政多累志遂寢父文耀公推重鄉邑賓客日集觴豆之需及嫁妹氏四人費皆出倫雖囊橐屢空卧不帖席見父則喜見辭面不令知之故文耀公得以放情事外每謂人曰吾見孝子也弘治改元夏夜失火家皆奔竄時文耀公在殯倫倉皇無措撫其棺而號曰父若有靈默相吾力以脫此災卽與其妻昇出之後數人莫能舉時以爲異感世父無子倫父事之

而忘其勞訓諸子業商者曰富貧命也無求非分適
取人輕業儒者曰洽羣書自然有得若執一說以橫
於中則吾道窒矣應事不任術惟因於心嘗曰天理
只在人心心術壞天理虧矣又曰吾人所以多事者
起於小不忍也若寧少寬自無事矣時以爲格言鄉
氓延火毀其木之可材者價可數十金詣門引罪憫
其誤慰而遣之清寧宮災詔徵輸木京師衆推倫總
其事或導以私倫曰因人信已而逞其詐可乎或沮
而退常賈於蘇郡守類給商錢數千緡有乘衆不知
而易其半者倫以正言責之易者懼曰不失君利可

矣堅不聽悉追原給者公散之歲侵縣發粟賑饑里胥緣爲奸有涕泣而空返者卽抗聲爲白之賴以舉火者十餘家陳某犯不法禍延旁族有司索之甚嚴倫適長于里代釋之後以金來謝却之曰吾所以爲若釋者憐若無辜也豈望報耶鄉曲不相能爭往質之倫如身當其憂雖損已廢時不恤也人益恩之遇事多得力年六十七而終

補遺

唐仲實

唐仲實名桂芳以字行號白雲歙縣人穎悟絕人元

未隱居授徒不復仕進 高皇帝駐蹕郡中延訪耆
舊守臣鄧愈以名聞與姚璉鄭桓俱召對稱 旨首
陳不嗜殺人 上嘉納賜尊酒束帛因力陳百姓失
業築城之苦 上曰築城以衛民何反迫促以失人
心卽命罷之居無何起攝紫陽書院山長人文多所
振起其爲文以氣爲主辭嚴理正生平爲尚行誼嘗
嫁兄之孤女賑窮卹匱所著有武夷小稿白雲集畧
學者稱爲白雲先生子文虎文鳳文奎並以文學稱

康永韶

康永韶祁門縣人洪武五年舉人除御史巡按江西

建言落職後累陞太常少卿以占天象預奏六月雨雪兼領欽天監正陞禮部右侍郎致仕

汪仲魯

汪仲魯名叡以字行婺源人既冠遊江淮兩浙歸與同鄉倪士毅鄭玉朱升趙汭諸先達相討論會元季干戈聿興與弟同集義旅以靖鄉邦 國朝平定之後下詔徵賢有司敦趣就道見 上講書之西伯戡黎愜 聖意授承務郎左春坊左司直俾翊贊 皇儲 上亦日召侍講周旋兩宮間與朱善劉三吾稱三老 上憫其老而喘特賜朝房 御製薰風南來

諸詩並命續之皆稱 旨遇春夏有囚罪至死者仲
魯輒涕泣請決以時 上稱善人明年以老疾陳乞
上御奉天宜召賜坐撫諭賜歸儒者榮之仲魯信道
甚薦氣和而莊間關亂離安人澤物以底昇平爲文
深博古雅賦頌詩歌咸歸于正

唐子儀

唐子儀名文鳳以字行歛人善真艸隸書法郡守辟
教紫陽書院尋以薦授興國令以賢著徵于朝 文
皇簡名流爲趙漢藩官屬擢趙王紀善以禮義導翼
數有諫諍後調洛陽丞乞身歸年八十六卒于家子

儀與祖元父仲實俱以文學擅名時號小三蘇爲詩
文豐縟閎深六書亦精妙所著有梧崗集

汪敬

汪敬婺源人宣德癸丑進士事親至孝登第以母老
不願就養遂乞歸不赴選後授戶部主事廉能不著
嘗以徽民苦于漕運爲請于上得納輕齎鄉人至
今德之致仕家居聚徒教授著有梅邊讀易稿家禮
集議

江浩

江浩字敬夫歙人宣德乙卯鄉舉授江西廣昌知縣

以廉能稱正統十四年間閩廣寇鄧茂七侵掠縣境
浩親率民壯禦之賊不敢犯民賴以安以功遷判建
昌仍治縣事秩滿卽陞本府知府前後撫臣楊寧韓
雍雅器重之以最膺 誥命陞兩浙運使廣昌民立
祠祀之

莊 歛

莊歛字尚源歛人父觀任陝西學憲以剛正詳慎稱
歛景泰辛未進士拜河南道御史務持風裁以古人
自期彰德衛官坐盜賣官草僞作未徵之數同僉書
者皆論死歛以株連情輕疏免之治獄類多平反京

省官皆隸本道考察賢否悉符公道人服其明歷按
浙江福建廣東奏免徵輸禁銀鑛省冗員止採珠夫
役風采赫然累遷按察雲南獄訟悉以土俗折之政
化大行終河南右布政父子俱爲憲臣世有清節士
論多之

汪尚寧

汪尚寧字廷德歙人嘉靖己丑登進士歸將受室聞
湛甘泉以列卿居畱都往學其門還乃成婚授行人
司副遷戶部員外郎中尚書梁少保材深器重之
上幸楚簡才以從尚寧在行一切倚辦淹七載遷守

兗州務持大體興利拯敝王府故暴橫每陰持有司
短長尚寧以禮匡之悉咸服大盜起出藏錢廩諸擊
賊者境內以寬陞陝西副使備兵潼關有斥地萬頃
可田豪右交爭爲度田均賦西延有隙地界兩部莫
屬爲按籍作爰田民乃大安轉叅政山西增築城堡
百餘所外捍虜內護諸邊進雲南按察尋右藩司會
夷酋那鑑亂刺殺左布政請兵平之轉左使秩滿晉
南光祿卿旋以副都撫南贛爲祠祠周濂溪王陽明
而羣諸人士講學其中大猾僭號稱王勢漸張授方
畧馘渠魁散諸脇從者事平或請疏聞可論功竟置

不言久之慧星見 詔議諸大臣屬執政方用事尚
寧素不修問遺積慳之乘是坐罷歸時年四十七父
母俱在怡然子舍絕口當世一意問學卒年七十著
有周潭集廣資錄日錄及四晚抄事物圖說諸書今
其子孫移家宣城

殷正茂

殷正茂字養實號石汀歙人嘉靖丁未進士授行人
擢兵科給事侃侃無所避忌平江伯聯姻分宜怙勢
恣行正茂疏其不法貴戚竦然 上有事齋宮祠上
帝正茂與諸科臣言黷祭非禮執不進香俱杖于廷

尋補廣西提學副使振厲士節兼攝撫夷道會猺酋
互攻作難逐縣令正茂下片檄平之猺酋白振橫行
地方先後捕勦不獲正茂密計擒斬由是以知兵顯
于粵除雲南備兵瀾滄時西洱女夷爭印幕府議討
正茂言蠻夷自相戕宜制以勝算不足煩兵不聽後
卒無成功艱歸起湖南驛傳遷浙江糧儲叅政陞江
西廉憲屬廣西猺獞作逆隆慶三年特設開府專事
征勦擢正茂右僉都往討先是猺陷古田盤踞有年
比至集兵大舉破巢盪寇斬馘七十有奇捷聞進兵
部侍郎廕錫有加條上善後事宜悉著爲令升古田

爲永寧州設土司叅治粵西始寧東粵久中倭夷隆慶五年 詔總督兩廣時倭陷錦囊電白而山海徭狼諸賊竊發所在騷然正茂經畧全省明立章程募倣韓襄毅平兩廣故事一切持以嚴明分布攻守次第削平前後擒斬俘馘以五萬餘東西底定爲百粵未有之勲云萬曆元年大捷陞右都御史二年再捷加兵部尚書二年改南戶部尋晉北戶部會 上大婚禮成而費不濫樽節爲多力爲歙邑請甦丁絹之偏累事雖中寢鄉人德之請告家居後起掌南刑部二載乞歸又十年卒年八十生平軒豁多大畧迎機

立斷故能夷難奏功第以任事無避不免人言身後
常典皆闕論者惜焉

方良曙

方良曙字子賓歙人幼從王御史獻芝及其弟獻蓋
受春秋嘉靖癸丑進士授南刑部主事母喪除補工
部榷木荊州關吏請算舟充額良曙以受命榷木非
權舟也不許權旣足額乃罷兩月商縉遷員外丁父
憂起比部進郎中恤刑畿輔多平反東明不雨者三
月比行部至恤三寃獄雨大澍遷河南副使治河躬
行臯陸審便宜上河渠使者書陳得失大畧以河堤

逼河故易嚙又築甬近取土堤下故易瑕宜避河怒
寬爲堤輦客土而築之母爭尺寸利并罷一切徵發
以息民力使者條上悉當副使議絜爲令新鄭相起
于家大吏畢賀良曙獨不往新鄭顧心重之進江西
叅政攝藩篆 詔徵造宣紅瓷缸上疏請罷之竟寢
按察湖廣尋進河南右布政使上計轉雲南左使滇
故軍興民困下車與境內更始故事歲發帑濬昆明
池費鉅功寡良曙自經營樹坊堰主蓄洩溉田萬頃
迄今永利以其羨佐築晉寧安寧二州城始入滇庫
貯僅三萬末年十倍遂甲諸藩儲羨毫無所取六年

游應乾字順之婺源人嘉靖乙丑進士授戶部主事
親老請改南便養遂改比部讞獄皆傳情法晉郎中
以憂歸讀禮之暇編次律例備檢閱服除守故官益
明習舉職出守寧波不動聲色而理絀抑舞文吏置
之法郡庭肅然浚陂塘通水利與諸生講經術一時
所識拔皆取高等入詞林以事忤江陵移兩浙運使
精心釐剔鹺政一清滿六載晉廣西叅政守桂平轉
雲南按察使廣東右布政尋轉左歲稔發廩以賑捐
俸助弟子員時加督課士咸感奮任滿奇羨麾賑貯
公帑擢南太常卿陞南大理故以比部起家于法家

言尤習寃滯多昭雪攝戶部并糧儲皆以精敏稱入
晉戶部右侍郎總督倉場會計精密京倉主事故無
關防特疏給之詐僞悉絕先後條上四十餘事著爲
令竟卒于官生平篤慎貌朴言訥恬澹無競自畱曹
及鹽司與遠方藩臬皆淹迴轉徙卒用功名壽考終
所著五經約義讀律真詮皆規左粹奏議文集若干
卷

胡宥

胡宥字子仁號金峯休寧人隆慶辛未進士授大名
之長垣令葺學宮與士民更始平獄訟省租庸日程

生徒經藝治行爲三輔冠徵南臺御史奔生母喪居
廬日偕門人講業邑先師廟敝宥倡諸父老竭力改
作立尊經閣出家所藏書貯之學宮輪奐具美服除
補北臺按廣西所至輒申功令興文造士廣厲學宮
督府用兵八寨御史紀功功成賜金幣會江陵廢天
下書院宥力言粵西明道書院不當廢江陵嘆之外
補畢節僉事入境首新學宮出故輯通鑑會要刊布
之境內愛戴若父母入計京師會 廷議相壽宮遣
二卿主卜僉以宥習圭測宜贊二卿時 上幸山陵
咸在扈從規畫稱 旨賜金幣再還蜀病歿于官聞

報已移官少卿矣以單車入蜀止二豎子及病革一豎籲天願以身代主引刀自殺一豎剖股進之以祈勿藥士民如失怙恃爭上狀臺使請賻請祠畢節故無名宦祠有之自有始長垣相距三千里奔而哭者相望其義感人心如此

黃應坤

黃應坤字惟簡歙人比部郎鏜之子隆慶戊辰進士初令浮梁再補新淦以循卓推擢雲南道御史按部所至與監司策事同心相濟有若和羹出按雲中上谷時匈奴款關凡三出塞令譯者宣上威德具封事

備陳貢市便宜旋按山西復按山東躬治爰書勤敏
至于咯血遷大理寺丞佐治獄當廷尉詰不中款時
旁出一語詰之囚多立服一時廷中稱平未幾卒應
坤爲人恂恂不忤物而介然有立父子相繼爲名御
史俱以五品京朝官終云

余懋學

余懋學字行之婺源人隆慶戊辰登上第授撫州府
推官治有聲徵拜南戶科給事時江陵相獻白燕白
蓮頌懋學疏言災異頻仍上方下罪已詔刻畱脩
省而以祥瑞進失大臣誼已又疏畱都鎮守中貴橫

肆狀 上爲罷中貴自是官府皆慊之屬柄臣銳意
興革一切務督責之術乃陳存敦大親謬謬慎名器
戒紛更防諛佞五事語刺柄臣且侵宦幸一時從中
交購竟得 嚴旨爲民江陵怒不置屢中以危法示
意所部兩臺兩臺力持得免旣相臣與權璫相繼敗
詔起言事者十一人懋學爲首尋晉南尚寶卿浮沉
南中稍遷貳太僕旋卿南光祿累晉通政使會臨洮
失事當事主和戎乃緩臺使警報懋學廉得狀刺沉
匿邊吏置之法旋推南刑部右侍郎踰年改戶部督
儲 璽書加憲職行事儲政飭甚攝部篆復攝司空

力裁中璫窟穴諸奸利貴倖益側目報滿自劾遂致
仕時年五十餘也卒年六十 諭葬祭贈官大司空
錄其一子生平博學彊志尤明習典故著皇明大政
類編嘉隆大政輯要畱儲志南垣論世考及二史考
誤春秋蠡測尚書折衷仁獄類編諸書藏于家弟懋
孳舉甲辰進士筮仕山陰雅著循聲行取禮科給事
中議論獨持大體無所阿徇未竟所施而卒

曹樓

曹樓字世登號近陽歙人家傳戴禮學曾祖觀祖禎
兩世魁其經于鄉舉樓隆慶丁卯魁應天辛未登進

士時其父年已八十有八疏乞終養踰年父喪毀瘠終服選授戶部主事分司德州倉出入以時人頌其廉能庚辰克同考會試官歷陞郎中嚴繩胥吏度支一清會 詔修會計錄部尚書以屬樓擘畫多出其手悉條著令間右輪官錢註誤爲閱視按論坐死者下部議部尚書難科臣言樓力平之卒從末減陞四川督學憲副按部所至首論賢不肖之尤進退之而後校文關說一無所聽程士以雅平定咸厭士心會松茂用兵當事者才之率借籌畧捷聞與 賜金帛陞江西右叅政守湖東踰年入 賀竣事病卒于道

樓器度溫夷而操持堅不可奪孝友淳至里巷誦焉
蜀人思而祠之

方揚

方揚字思善歙人隆慶辛未進士授知河南陝州州
廩而疲至則裁濫供繩大猾興勵學校爲之購書置
田復采形家言引渠水通泮池陝久詘賓興至是始
振遷南戶部員外郎從畱都賢士大夫講明正學屬
同舍郎怙江陵相勢者私據公田駕言爲社以贍不
給請揚作記揚不之應遂以飛語中于執政左移知
隨州旋陞嘉興府同知郡大豪爲盜橫行連結奧援

吏不得問揚廉得狀以他事逮之數其罪立斃杖下
進七邑士子誘掖備至監兌雪上恤民力而便軍輸
攝篆嘉善作堤以捍水患適行度田均賦之令所部
檄揚董七邑躬行阡陌田賦一清嘗道出鄰郡遇盜
舟中盜知其名不敢犯羅拜受戒而去飢民與卒伍
鬻亂幾不可制揚開誠撫諭卒帖服會省城軍民繼
變當道甄材望擢知杭州府尋以病請告歸旋卒揚
自爲諸生時好學力行著考經句義行世出處一致
動稟聖賢居室箴銘積成卷帙號初菴學者稱初菴
先生著述匠心鑄古自成一家守官于常祿外不入

一縉清風介節月旦重之遺集傳于家

吳際可

吳際可字交甫號艾齋歛人未冠補郡庠弟子員郡守何東序奇之時延入署與之講藝隆慶庚午舉于鄉年二十二會試不第挾策山中昕夕誦讀不輟聚書萬卷人咸服其博雅數奇屢屈就官得合州學正訓士有方督學使及直指交薦文學第一擢司理溫州明于聽斷尤競競持之以恕里豪殺人重餌病廢者使自承抵獄久具際可訊殺者狀詰之曰若手攣足蹙甘以廢軀徇人死廢豈任操械殺人乎法不能

直死者寃而視無罪就死恐故鬼之枉未伸而重陷
新鬼也廢囚悟輸實乞餘生豪卒伏法一郡誦神君
其他疑獄得情類是攝篆永嘉薄罰省刑額內積穀
鍰至捐公廩抵之踰年徙知廣西左州會母年八十
乃陳情所部乞終養得請歸養母終喪無餘蓄蕭然
敝廬嘗倡族建廣惠廟以妥神築先塋以安祖創崇
本書院以訓族之子弟所著詩文若干卷文符若干
卷藏于家

楊武烈

楊武烈字伯承歙人壬午舉于鄉三上春官不第授

徒海陽家徒壁立泊如也壬辰魁會榜成進士選建昌府推官從御史行部嚴却餽遺持法務平恕新城有兄弟諸生得罪郡守者守屬厚傅之謝不可竟從末減豪右利寡婦之屋欲奪之婦厝夫柩于室以自守豪購人破壁發柩因攘之屋愬諸理卒懲豪而還屋于寡婦瀘溪老人有地近宜黃富人墓富人強據之果訟不得伸已自投臺憲願質楊司理一訊而得情廣昌素封納人于竹筐而生埋之者里畏之莫敢發武烈陰廉得狀起埋者其面猶如生竟抵罪郡以爲神兩攝郡邑篆令行禁止百廢具舉其收治市僧

號十三太保者尤使武斷屏跡葺學宮以造士所獎賞皆名士先後分校于齊楚稱得人未滿秩而其門下士多躋清華矣遷戶部主事轉欽遠左盡瘁于役還里旋卒清貧至不能葬後其門人令歛厚撫其家始克襄事武烈居家孝友居官廉明中年而歿論者謂不盡其用云

吳中明

吳中明號左海歙縣人萬曆丙戌進士授江西瑞州府推官丁憂復除汀州府推官陞南刑部主事郎中陞廣東副使調河南提學陞本省右叅政晉按察使

以陝西右布政擢都察院右僉都御史巡撫廣西丁憂起南戶部侍郎丁巳卒中明少勵清節登籍後愈自砥勵所至鱗然不染而吏弊民情不啻燭照數計到處多所樹立又非僅以清名著也

范涑

范涑號晞暘休寧人萬曆甲戌進士授南城知縣庚辰行取陞南刑部主事辛巳陞員外壬午陞南戶部郎中乙酉陞南昌知府庚寅陞江西副使辛卯被論降用癸卯補浙江副使乙未陞四川叅政戊戌陞浙江按察使辛丑陞本省右布政甲辰陞福建左布政

涑素持清節而亦不乏擔當歷任中外孤介寡合翩
翩自成一家亦特立獨行之君子云